



Pou Piblikasyon Imedya: 21/12/2021

GOUVÈNÈ KATHY HOCHUL

**GOUVÈNÈ HOCHUL ANONSE 230 MILYON DOLA NAN ASISTANS ALIMANTÈ  
SIPLEMANTÈ POU NOUYÒKÈ YO NAN MWA DESANM NAN**

***Sipleman yo pote plis pase 2.4 milya dola nan avantaj alimantè sipleman an  
2021***

***Tout fwaye SNAP yo pral resevwa nivo avantaj alimantè maksimòm***

Gouvènè Kathy Hochul te anonse jodi a ke tout Nouyòkè ki enskri nan Pwogram Asistans Nitrisyon Sipleman (Supplemental Nutrition Assistance Program, SNAP) a ap resevwa nivo avantaj alimantè maksimòm ki otorize a pou mwa desanm nan. Tout fwaye k ap patisipe nan SNAP—sa gen ladan sila yo ki deja nan nivo avantaj maksimòm—pral resevwa alokasyon sipleman pita nan mwa sa a, sa ki pral mennen nan anviwon 230 milyon dola finansman federal nan ekonomi eta a mwa sa a ak plis pase 2.4 milya dola depi janvyè.

"Pandan n ap kontinye batay kont pandemi COVID-19 la, twòp Nouyòkè gen difikilte pou mete manje sou tab", **Gouvènè Hochul te deklare.** "Kounye a plis ke jamè, nou dwe poze aksyon pou nou elimine ensekirite alimantè. Fon sipleman sa a pou SNAP pral bay soulajman pou Nouyòkè yo ki nan bezwen pandan mwa ivè frèt yo lè bidjè fwaye yo deja pa ase".

Sipleman èd ijans lan bay ak fwaye yo ki pa nòmalman resevwa alokasyon maksimòm ki otorize chak mwa nan SNAP - yon pwogram ki finanse pa gouvènman federal epi se Biwo Asistans Tanporè ak Andikape (Office of Temporary and Disability Assistance, OTDA) eta a ki administre li. Fwaye sa yo ki deja toupre oswa nan nivo maksimòm avantaj la pral resevwa yon peman sipleman omwen \$95.

Fwaye SNAP k ap viv nan tout konte ki andeyò Vil New York yo dwe wè avantaj sa yo ki afiche rive nan fen jounen jodi a ki se 21 desanm. Fwaye SNAP sa yo k ap viv nan rejyon senk konte Vil New York la dwe wè avantaj pa yo efekte ant kounye a ak fen mwa a.

Nouyòkè ki gen difikilte yo kontinye depann de SNAP la anpil pandan pandemi COVID-19 la kontinye afekte lavi chak jou. Apati oktòb 2021, te gen apeprè 1.6 milyon fwaye k ap resevwa SNAP atravè eta a, sa ki bay yon total ki plis pase 2.77 milyon Nouyòkè.

**Komisè Egzekitif Adjwen OTDA, Barbara Guinn, te deklare,** "Nouyòkè yo kontinye batay nan mitan konsekans ekonomik kriz sante blogal la, jan sa pwouve atravè apeprè 1.6 milyon fwaye ki konte sou avantaj alimantè pou rive siviv. Avantaj siplemantè sa yo kontinye jwe yon wòl enpòtan nan ede redui ensekirite alimantè atravè eta a, pandan l ap bay yon bourad ki nesèsè anpil pou ekonomi New York la".

Menm jan pou mwa ki pase yo, peman yo ap fèt dirèkteman sou kont Transfè Elektwonik Avantaj (Electronic Benefit Transfer) benefisyè yo deja genyen an epi y ap kapab itilize l avèk kat EBT yo deja genyen an. Menm jan ak avantaj nòmal SNAP yo, avantaj siplemantè yo ka sèvi pou achte manje nan magazen ki vann manje an detay ki otorize yo. Tout avantaj SNAP ki pa sèvi yo ap otomatikman rapòte nan pwochen mwa k ap vini an.

Chak dola ki investi nan avantaj alimantè yo kapab jenere jiska 1.54 dola nan aktivite ekonomik, dapre yon etid federal ki mezire enpak SNAP sou ekonomi Etazini an. Etid la te jwenn tou ke 1 milya dola siplemantè ki investi nan nouvo avantaj SNAP yo ka sipòte apeprè 13,560 travay nan tout peyi a.

Jwenn plis enfòmasyon sou avantaj siplemantè SNAP pou ka dijans yo, ansanm ak repons pou kesyon moun poze souvan yo, isit la. Nouyòkè yo kapab verifye si yo elijib pou SNAP epi aplike sou entènèt lè yo ale sou [mybenefits.ny.gov](https://mybenefits.ny.gov).

###

Lèt nouvel disponib sou sit [www.governor.ny.gov](https://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418

[ANILE ENSKRIPSYON OU](#)